

Debi na Demanda Halto, e Tayer di Poesia ta Regresa Bek pa Art Rules Aruba

Presenta pa un Yiu di Tera Arubiano, e Poeta, Autor y Presentador Rosabelle Illes

E aña aki Art Rules ta celebra 5 aña. Cu maestronan viahando for di rond di mundo pa duna les di arte den varios disciplina, Art Rules a inspira y motiva mas di 700 hoben aspirante desde su lansamento na 2010. Ademas di e lustro di 5 aña, e fundadonan di Art Rules awo ta expandiendo e programa pa bai Corsou. Debi na e expansion di produccion di Art Rules entre 2 isla, e fundadonan a scoge pa ofrece Aruba 7 en bes di e 9 disciplinanan di arte cu awo ta wordo ofreci den e programa. Aunke cu Rap & Poesia tabata un di e lesnan cu nan no tabatin planea pa ofrece e aña aki, e fundadonan a haya nan mes forsa pa reintroduci e klas aki debi na e demanda halto di esunnan aplicando y pidiendo pa trece e klas aki bek. Rap & Poesia ta e unico tayer di Art Rules cu ta enfoca riba skirbimento y poesia, y e ta sumamente popular bou di e hobennan. Reintroduci bou di su nomber *Art Rules Skirbimento Creativo & Poesia*, e tayer ta diseña pa siña studiantenan maneranan creativo di organisanan pensamiento, imaginacion y inspiracion pa asina transforma esakinan den obranan skirbi. Studiantenan lo ricibi sesionnan introductorio interactivo

di poesia, ficcion (storianan cortico), skirbimento di cantica y skirbimento di obranan teatral. E tayer tambe ta inclui bishitanan pa compone obranan den diferente ambiente como tambe un anochi di open-mic, unda studiantenan ta invita pa presenta e piesanan di nan escogencia. E maestro di e tayer ta e artista Arubiano Rosabelle Illes, kende ta formando parti di e programa pa e di dos biaha. Rosabelle Illes ta e autor di dos coleccion di poesia, esta "Beyond Insanity" (2005) y "Spiel di mi Alma" (2010) y ta e creador di un kalender di arte titula "Wholism" (2012). Den transcurso di su carera literario, Rosabelle a presenta y exhibit su obranan na Aruba, Corsou, Boneiro, Grenada y Hulanda. Actualmente Rosabelle ta trahando riba un buki di mucha den colaboracion cu e cantante-escritor di cancion Curasoleño Levi Silvanie, kende por cierto tambe lo fungi como e maestro di Art Rules 2014 Musica & Presentacion. Rosabelle tin un BA den Psicologia cu un minor den Ingles for di Webster University y un MSc. den Psicologia Social y Organisatorio for di e Universidad di Leiden, unda



actualmente e ta un candidata doctoral den psicologia.

Presenta pa RBC Royal Bank, Art Rules Aruba ta cuminsa riba dia 5 di Juli y lo tuma luga durante 2 siman cu un presentacion final riba dia 18 di Juli na Cas Di Cultura. Espacionan limita ta obtenibel ainda pa Art Rules Skirbimento Creativo & Poesia. Ofreci na esnan entre 16-26 aña, for di 10'or di mainta pa 4'or di atardi tur dia. Interesa pa participa den e programa? Registra awo ora bo bishita e website na www.artrulesaruba.com/apply

Pa mas informacion riba TUR e maestronan, tayernan e ultimo desaroyonan, noticia y mas, bishita www.artrulesaruba.com of Art Rules riba nan plataformanan social via [@facebook.com/artrulesaruba](https://www.facebook.com/artrulesaruba) @twitter/artrulesU Instagram@Artrulesflicks